

15-01-2026

आकाशवाणी

खबरां जगमोहन शर्मा कोला,

खास-खास खबरां:-

1. प्रधानमंत्री नरेन्द्र मोदी अज्ज नमीं दिल्ली च राष्ट्रमंडल अध्यक्षें ते प्रिजाइडिंग अफसरें दे 28में सम्मेलन दा उदघाटन करगंन।
2. महाराष्ट्र च 29 म्युनिसिपल कारपोरेशनं लेई वोटिंग शुरू- वोटें दी गिनतरी कल कीती जाग।
3. 78में सेना दिवस आली परेड दा अज्ज बड्डलै जयपुर च आयोजन कीता जा रदा ऐ।
4. अमरीक नै ऐलान कीता ऐ जे ओ पाकिस्तान ते बांगलादेश सनें 75 मुल्खें थमां प्रवासी वीजे आली प्रक्रिया गी आरजी तौरा पर रोकी देग।
5. तमिल बोलने आले लोकें आसेया अज्ज दुनिया भरै च "पौंगल" दा त्योहार जोशो-खरोश कन्नै मनाया जा रदा ऐ।
6. मर्दे दे इक ध्याड़े आले अंतराष्ट्रीय क्रिकेट च न्यूजीलैंड नै कल खेड्डे गेदे मौजूदा श्रृंखला दे दूए मुकाबले च भारत गी 7 विकेटें कन्नै हराई दिता ऐ।

<><><><><>

PM-CSPOC

प्रधानमंत्री नरन्द्र मोदी होर अज्ज राष्ट्रमंडल अध्यक्षें ते प्रिजाइडिंग अफसरें दे 28में सम्मेलन दा उदघाटन करगंन। लोकसभा अध्यक्ष ओम बिरला होर इस सम्मेलन दी अध्यक्षता करगंन। 42 राष्ट्रमंडल मुल्खें दे 61 अध्यक्ष ते प्रिजाइडिंग अफसर सम्मेलन च हिस्सा लै करदे न। एहदे कन्नै गै 4 नीम खुदमुख्तयार संसद बी इस सम्मेलन च शामिल होआ करदे न। सम्मेलन च मेद ऐ जे मजूदा समें दे संसदी मुद्दें दी इक तफसीली श्रृंखला पर व्यापक चर्चा होग- जेहदे च लोक तांत्रिक संस्थाएं गी निगगर-असरदार ते कार्जशील बनाई रखने च अध्यक्षें ते प्रिजाइडिंग अफसरें दी भूमिका पर चेचे तौरा पर ध्यान केन्द्रित कीता जाहग। एहदे इलावा जिनें होरनें बिषयें गी सम्मेलन च शामिल कीते जाने दी मेद ऐ- उन्दे च- संसदी कम्म-कारवाइयें च आर्टिफिशल इंटेलीजेंस दा इस्तेमाल- सांसदें पर सोशल मीडिया दा प्रभाव ते संसद दे सार्वजनिक मुद्दें गी लेइयै समझ गी बधाने गितै नमियें नीतियें ते तौर-तरीकें अपनाने दे इलावा आम जनता दी शमूलियत छड़ा वोट पाने तगर महदूद नैई रखने बारे बी विचार-बटांदरा कीता जाहग।

<><><><><>

Maharashtra Polls

महाराष्ट्र च 29 नगर-निगमें लेई मतदान बड्डलै साड्डे 7 बजे दा शुरु होई गेदा ऐ- जेहड़ा शामी साड्डे 5 बजे धोड़ी चलोग। उत्थे 893 वार्डे दी 2 ज्हार 869 सीटें लेई अज्ज वोट पोआए जा रदे ना। 3 करोड़ 48 लक्ख मतदाता 15 ज्हार 931 मेदवारें दे चुनावी भविकख दा फैसला करगंन। इंदे च मुम्बई दे 1 ज्हार 700- जिसलै के पुणे दे इक ज्हार 166 मेदवार शामिल ना। वोटें दी गिनतरी कल होग।



Prez -Punjab Visit

राष्ट्रपति द्रौपदी मुरमू होर अज्जै थमां पंजाब ते राजस्थान दे दंडु दिनें दे दौरें पर होगंन। अज्ज पैहले रोज ओ अमृतसर च गुरु नानक देव युनिवर्सिटी दे दीक्षांत समारोह च च शामिल होगंन- जिसलै जे कल उंदा जालंधर च डाक्टर बी.आर अम्बेडकर राष्ट्रीय प्रोद्योगिकी संस्थान एन.आई.टी दे 21में दीक्षांत समारोह च हिस्सा लैने दा कार्यक्रम ऐ। ओहदे मगरा राष्ट्रपति मुरमू जयपुर च रामानंद मिशन आसेया आयोजित 1008 कुंडीय हनुमान महायज्ञ च शामिल होगंन।



Jaipur Army Day Parade

जयपुर च अज्ज 78में सेना दिवस परेड दा सरिस्ता कीता जा रदा ऐ- जेहड़ी बड्डलै अंदाजन कोई 10-क बजे शुरु होग। जगतपुरा दे मैहल रोड पर सेना अपने अनुशासन-ताकत- समर्थ ते आधुनिक छमताएं दा प्रदर्शन करोग। रक्षामंत्री राजनाथ सिंह-राजस्थान दे मुखमंत्री भजन लाल शर्मा ते सेना प्रमुख जनरल उपेन्द्र द्दिवेदी परेड च शामिल रौहगंन। इस बरे दा आयोजन इस करियै बी विशेष महत्व रखदा ऐ कीजे पैहली बारी सेना दी परेड फौजी छौनी शा बाहर होआ करदी ऐ।



Security Review

केन्द्रीय गृह सचिव गोविंद मोहन होरें बुधवारें जम्मू च इक उच्च सतह दी बैठक लाइयै- खिते च जारी आतंकवाद रोधी कारवाइयें दी प्रगति दा जायजा लैता। आकाशवाणी जम्मू संवाददाता दी रिपोर्ट मूजब बैठक च खूफिया ब्यूरो दे निदेशक Tapan Deka- सीमा सड़क संगठन दे महानिदेशक- CRPF दे D.G जी.पी सिंह- पुलस महानिदेशक नलिन प्रभात- सेना-पुलस- सिविल प्रशासन ते खूफिया एजेंसियें दे होर दुए वरिष्ठ अफसर शामिल होए। बैठक दौरान अंतरराष्ट्रीय बन्ने ते कब्जा रेखा कन्नै लग्गदे इलाके च ड्रोन गतिविधियें पर बी चर्चा होई। गृह सचिव होरें सब्भनें गी आपूं-चे नेडमा तालमेल बनाइयै कम्म करने लेई गलाया।



US -Viza

अमरीका नै पाकिस्तान ते बांगलादेश सनें 75 मुल्खें आस्तै अप्रवासी वीजा प्रक्रिया पर रोक लाने दी घोषणा कीती ऐ। विदेशी मैहकमे नै आखेया ऐ जे इनें मुल्खें दे अप्रवासी- अमरीका च नामंजूर दरे पर कल्याणकारी योजनाएं दा फैयदा लेंदे होई अमरीका पर खामखा दा आर्थिक बोढ बना करदे न। अमरीका नै आखेया ऐ जे जिसलै तगर अप्रवासी आर्थिक लाह लेना बंद नैई करदे- उच्चर एह पाबंदियां लागू रौहगंन।



Lalu Trial

दिल्ली हाई कोर्ट नै राश्ट्रीय जनता दल प्रमुख लालू प्रसाद यादव ते उंदे पुत्र तेजस्वी यादव होरें गी इक बड्डा झटका दिंदे होई IRCTC घोटाले मामले च चला करदे मुकदमे पर रोक लाने सवां नां करी दिता ऐ। जस्टिस स्वर्णकांता शर्मा हुंदी पीठे मामले दी सुनवाई दौरान आखेया जे मुकदमा जारी रौहग- पर गवाहें कोला जिराह अगले हफ्ते तगर कीती जाई सकदी ऐ- तंदू तगर अदालत आसेया पेयो-पुत्र आसेया आरोपें गी चुनौती देने आहली अर्जियें पर फैसला सुनाए जाने दी मेद ऐ। लालू प्रसाद यादव हुंदे पक्खै दे वकील कपिल सिब्बल होरें एहदे पर तर्क दिता ऐ कि अर्जियें दे बकाया रौहने दे चलदे मुकदमें पर रोक लाने बारे सुनवाई लेई मामला सूचि च रखेया गेदा हा।



Pongal Fest

दुनिया भरै च अज्ज तमिल बोलने आहले लोक “पोंगल” दा ध्यार बड़े मते उत्साह ते शरदा भाव कन्नै मना करदे न। तमिल कलेंडर साब्बे इसी बांदी बहार दे औने ते जीवन दे हर क्षेत्र च नर्मी शुरुआत दा प्रतीक मन्नेया जंदा ऐ। तमिल समाज च इस ध्यार दा महत्व केई मायनें कन्नै बड़ा अहम ऐ। लोक इस महीने ब्याह-कार्जे, नमें कम्म- कारोबारें दी शुरुआत बी करदे न। इस ध्याड़े लोक नर्मी फसलें दी बाहडी मगरा अन्नदाना सूर्ज भगवान दे नमित बी करदे न।



Cricket

न्यूजीलैंड नै कल रातीं राजकोट च भारत गी दुए- इक रोजा अंतराश्ट्रीय मैच च 7 विकटें कन्नै रहाइयै श्रृंखला च 1-1 दी बरोबरी करी लैती ऐ। पैहले बल्लेबाजी करदे होई भारत नै- 50एं ओवरें च 7 विकटें दे नुकसान पर 284 रन्ज बनाए। परते च न्यूजीलैंड नै डैरिल मिचेत दे नाबाद 131 रन्ज दी शानदार पारी दी बदोलत 285 रन्ज दा लक्ष 15 गेदां बाकी रौहदे हासल करी लैता। डैरिल मिचेत गी मैच दा बेहतरीन खडारी घोषत कीता गेया।



WPL

महिला प्रीमियर लीग क्रिकेट च कल रातीं नवीं मुम्बई दे डी.वाई पाटिल स्टेडियम च खेड्ड गेदे इक मैच च दिल्ली कैपिटल्स नै यू.पी. वारियरस पर 7 विकट कन्नै जित हासिल कीती। दिल्ली कैपिटल्स नै 155 रन्ज दे लक्ष्य गी 20 ओवर च 3 विकटां मुहाड़यै हासिल कीता।



IMD Weather

मौसम विभाग नै दिल्ली-हरियाणा- चंडीगढ़- पंजाब- उत्तराखंड ते पच्छमी उत्तर-प्रदेश च अज्ज बड़ा मता घना कोहरा छाए रौहने दा ऑरेंज अलर्ट जारी कीता ऐ। अगले 2 दिनें च हिमाचल प्रदेश- बिहार- पूर्वी उत्तर-प्रदेश- पच्छिम बंगाल च हिमालय दे तराई आहले क्षेत्र- जम्मू-कश्मीर- लद्दाख- असम- मेघालय ते सिक्किम दी बी किश थाहरें पर घना कोहरा रेई सकदा ऐ। मौसम विभाग मूजब अज्ज दिल्ली- हरियाणा- चंडीगढ़- पंजाब- राजस्थान- उत्तराखंड- हिमाचल प्रदेश- झारखंड- ओडिशा ते छत्तीसगढ़ च सीत लैहर दी संभावना ऐ।

केन्द्र शासित प्रदेश जम्मू-कश्मीर च सीत लैहर दा प्रकोप बरोबर जारी ऐ। कश्मीर च तापमान जमाने आहला बने दा ऐ ते जम्मू च किश थाहरें पर तापमान च खासी कमी दिक्खी जा रदी ऐ- जेदे करी आम जन-जीवन प्रभावित होआ ऐ। जम्मू दे मैदानी इलाकें च अज्ज बी धुंध दिक्खी गेई- जेदे करी लोकें गी औने-जाने च परेशानी पेश आई। मौसम विभाग नै अज्जै तगर खिते च मौसम खुशक बने दे रौहने दी पेशगोई कीती दी ऐ। उयां 16 ते 17 जनवरी गी किश थाहरें पर हल्की बरखा ते बर्फबारी होई सकदी ऐ।



Read by : **Jagmohan Sharma**
Stand by : **Shruti Khajuria**
D.E.O. : **Rajni Devi**
Skilled : **Rajat Paul**
Editor : **Kunal Shrivatsa**